

ինքնորոշման հիմունքով», բայց և շտապում է աւելացնել, թէ «չպէտք է խառնել հարեւան պետութիւնների ներքին զործերին», այսինքն՝ ձեռք քաշել թրքահայկական դատից:

Կառավարութեան կազմութեան հարցում Աղայեւը դնում է «խիստ կօալիցիայի» պահանջը՝ հաշւի առնելով «ազգային խմբերի իրական համեմատութիւնը»: Միատարր-ընկերվարական իշխանութիւնը անընդունելի է միանգամայն: Պատճառը հասկանալի է. մահմետականների մէջ տիրող տարրը բէգերն ու կալածատէրերն էին:

Անդրկովկասի վարչական բաժանման վրայից Աղայեւը անցնում է լուռութեամբ, բայց ազրբէջանցիների ընդհանուր քաղաքականութիւնից դիտենք, որ նրանք վճռականապէս հակառակ էին հայկական ծրագրին, որի դէմ պայքարում էին 1916-ի ղեմստույակային խորհրդակցութիւններից սկսած:

Վրաց բաղձանքները արտայայտեց ժորդանիան, որ իր առաջադրած խնդիրներով աւելի մօտենում էր ազրբէջանցիներին, թէև խօսքերով աշխատում էր ցոյց տալ հակառակը:

Ռուսաստանի հարցում նա, ըստ էութեան, կանգնեց Աղայեւի տեսակէտի վրա. «Ժողովրդական կոմիտարների խորհրդի ընդունած հաշտութեան վերջին պայմանները, որոնք ամբողջ Ռուսաստանը մատնեցին գերման իմպերիալիստների քաղաքական ու տնտեսական գերութեան, է՛լ աւելի կարեցին մեզ Ռուսաստանի հետ կապող թելերը: Եւ մեր Սէյմը այժմ իրեն համար հիմնական նպատակ պէտք է դնէ սեփական ուժերով այս երիտասարդ երկիրը՝ Անդրկովկասը վերածել իրաւականօրէն կազմակերպւած Անդրկովկասեան Հանրապետութեան»: Այս կէտում տարբերութիւն չկայ ժորդանիայի և Աղայեւի միջև:

Յետոյ, Անդրկ. Հանրապետութեան Սէյմը, առաջին հերթին, պէտք է հաշտութիւն կնքէ թիւրքերի հետ, բայց ո՛չ այնպիսի հաշտութիւն, որպիսին ստորագրեցին բոլշեւիկները. «Մենք այդպիսի հաշտութիւն չենք ստորագրի և կարծում ենք, որ աւելի լաւ է մեռնել պատուով դիրքերում, քան խայտառակել և սերունդների անէծքին ենթարկուելը»: Այս կէտում, ժորդանիան Քաջագինունու հետ է. նա պահանջում է «պատւաւոր հաշտութիւն», թէև յետագայ դէպքերը ցոյց տւին, որ ժորդանիայի «պատւաւոր հաշտութիւնը» շատ քշով է տարբերում Աղայեւի «անպատիւ» հաշտութիւնից:

Իշխանութեան կազմութեան խնդրի վրայից ժորդանիան անցաւ լուռութեամբ. փափուկ դրութիւն էր. եթէ պահանջէր միատարր-ընկերվարական կառավարութիւն, ինչպէս պահանջում էր յեղափոխական խորհուրդների կենտրոնում, դժգոհ կը լինէին ազրբէջանցիները. եթէ պահանջէր կօալիցիոն կառավարութիւն, ինչպէս զործնականօրէն անց էր կացնում Սէյմի կուլիսներում, դժգոհ կը մնային յեղափոխական խորհուրդները: Ահա մի տեղ, որտեղ լուռութիւնը իսկապէս ոսկի էր:

Անդրկովկասի սահմանների վերաբաժանման հարցում ժորդանիան պաշտպանում էր Դաշնակցութեան տեսակէտը. «յենւելով հողային սկզբունքների վրա՝ մենք պէտք է գոյութիւն ունեցող ազգերը սահմանաբաժանենք այնպէս, որ միմեանց չխանգարեն, ընդհակառակը, որ նրանք կարողանան աջակցել միմեանց և միացեալ ու ըզհանուր ջանքերով դուրս բերեն մեր